

Carta Cha Sacuhun Ra Apóstol Judas Chi Ñáyivi Yihí Cuenda Nyoo

**Nu tyaq ra Judas noo tutu
chi ñu nacana Nyoo chi**

¹Yuhu ra Judas cuví noo ra sacuví tyiño nuu ra Jesucristo. Ta yañi ra Jacobo cuví chii. Tyaí noo carta ihya chi ndo cha cuví ndo ñáyivi cha nacana Nyoo Sutu yo. Ta naquehén vaha ra chi ndo vatyí cuví ndo ñáyivi cuenda ra. Ta vityin cumí vaha ra chi ndo cha cuenda cha ñin ri cuví ndo chihin ra Jesucristo. ²Nyoo na nyehe ndahvi ra chi ndo. Ta na cutuñi ca ñi ndo yoso caa cha cuñí ra chi yo. Ta na coo cuaha ca cha taxi ri cuñi ñima ndo, saha ra.

**Nu cahān ra Judas siquí ñáyivi cha
sañahá cha ña ndicha**

(2 Pedro 2.1-17)

³Cha naha xaan yihí ñi tyai noo carta chi nyoho yañi, vatyí cuñí cahin chiin siquí yoso caa sacacū Nyoo ñima yo. Soco vityin cuñí chi cha tyaí tutu ihya chi ndo vatyí saniñi chi ndo cuniñi ñi ndo chihin tandihí fuerza ndo ta cuhun ndo ityi nuu ca chihin cha chinó ñi ndo tuhun vaha cha chahā Nyoo chi yo. Vatyí noo ri chaha chahā ra ta ñin

caña ri chahā ra tandihí cha tahán chi chi yo vatyí chinó ñi yo cha cuví yo ñu yihí cuenda ra. ⁴Vatyí yihí ra quihví xehe ra nu nyicu ndo. Ta cuñí ra sandavi ñaha ra chi ndo. Catyí ra vatyí cha yahā saha Nyoo ticahnu ñi chi yo ta yucuan chaha cuvi sacuvi yo yoso cuhva quichi cuvi ñi coño ñuhu yo. Soco ra canyacuví tyicuan caa, cuví ra noo ra cucunaa. Vatyí tyicuan caa catyí Nyoo nya tyembu chahnu, vatyí canyacuví ra cha quiñi caa cha ña tahán chi sacuvi ra. Vatyí ña caquichahá ra chi Nyoo ta ña chinó ñi ra cha Nyoo cuví noo ra cahnu ca, ra nyacá ñaha chi yo. Ta ñi ri ra Jesucristo Sutu Mañi yo, ña cahnu xaan cuví ra, cacatyí ra.

⁵Vasi cha chitó ndo cha sacuví Nyoo ta cha naha, soco cuñí sanicohín ñi ndo vatyí Sutu yo Nyoo tavā ra chi sutu chahnu yo ñu Israel ñuu Egipto, sacacū ra chi ñu ndaha ñáyivi ñuu Egipto cuan. Soco yahā cuan sanaq ra tandihí maa ñu cha ña chinó ñi chi ra. ⁶Ta tyicuan caa tucu ángel. Ii ra. Ñahri cuatyí ra. Soco suhva ra caquitā ra nu cuatyaq Nyoo chi ra cha cuenda cha ña quichahá ra chi ra. Yucuan

chaha Nyoo cumí ra chí ángel cuan, nuhñí ra chihin cadena nu ñaa iñi. Nyatú ra cha sacutuñi Nyoo chí ra na chaa chí quívi cahnu. ⁷Tyicuan caa tucu ñáyivi ñuu Sodoma ta ñuu Gomorra, ta ñu ñuu cuatyaa cha chiyo nicachico ñuu cuan. Sanaa Nyoo chí ñu cha cuenda cha quiñi caa cha chinyacuví ñu. Ca chiyo ri maa ra chihin ñusihi. Ta ñusihi ca chiyo ri maa ñu chihin noo ra ta chihin inga ra. Ta cuaha ca cha quiñi caa chinyacuví ñu vatyí rayí ca chiyo ra chihin tahan yí ra ñandihi. Soco cha cuenda cuan, nyehe ñu tindoho nu cayú ñu, quívi chahmí Nyoo ñuu ñu. Ta yucuan sañahá chí chí yo vatyí ñu sacuví cha quiñi caa, cucayu ñu chihin ñuhú cha ma ndahva ca maa.

⁸Ta tyicuan caa tucu ra cacuñí sativí chí ndo. Vasi cha chitó vaha ra cha sacuví Nyoo ta ityi chata ca, soco maa ra chicá iñi ra vatyí tyaquí xaan cuacoo ra nu cuahan ca chí chihin cha nyacuví ra tyicuan caa. Soco ndahvi ra vatyí tari quívi cha tahán ra noo ñumahna tyaquí cuví cuan. Sativí ra coño ñuhu ra ta ña cuñí ra cha cunyaca ñaha Sutu Mañi yo chí ra. Ta cahán ña vaha ra síqui ra nahnu ca cha nuu maa ra, cuví ri síqui ángel, cuví ri síqui tatyí ña vaha, cuví ri síqui Nyoo.

⁹Soco ángel Miguel cha cuví ra noo ra cahnu nuu Nyoo, ta ña caña iñi ra sacuví ra tyicuan caa. Vatyí quívi cañi tahan ra chihin ra ña vaha cha cuenda coño ñuhu ra Moisés, ña caña iñi ra cahán ña vaha ra síqui ra ña vaha. Noo ri cha catyí ra chí ra: “Maa Sutu Mañi yo na tachi tuñi ra chuun cuenda cha ña vaha

cha nyacuvún”, catyí ángel Miguel cuan chí ra. ¹⁰Soco ra cha sayangá chí ndo cuan, cahán cuehe ra vatyí ña chitó ra. Ta sacuví ra tari sacuví quití. Vatyí quití ña cutuñí iñi ti. Nyacuví ri maa ti cha cuñí coño ñuhu ti. Ta tyicuan caa tucu ra cuan. Chihin cha quiñi caa nyacuví ra, sativí ra chí ra.

¹¹iNdahvi ra ndahvi cuan! Vatyí quehen ra cha caa ra Caín. Ta cha cuenda cha cuñí ra saha ganaa ra xuhun, quitá caxiin ra tari quitá caxiin ra Balaam. Ta cucunaa ra tari cuanaa ra Coré, vatyí chihí ra cuan cha cuenda cha nacahnú ra nu cahán ra cuví nuu chí ra. ¹²Ra cha sayangá chí ndo chahá ra ticahan nuu chí ndo nu ndu iñn ri ndo. Vatyí chachí ra ta chihí ra, chihin cha síi cuñí ra. Ta ña cahán nuu ra cha ña sahá ra ñáyivi chí Nyoo. Ta noo ri maa ra sacuvahá ra chí ra. Cuví ra tari noo vico cha tyandahá tatyí chí, ta cuñí maa yo tyi cua coon savi, ta ña coón ra. Cuví ra tari noo yutun cha ña chaha chití. Vatyí noo yutun cha ña chahá chití cuví tun tari noo yutun chihí vasi nyitó tun. Ta síin maa cha cucúvi vaha tun vatyí cucahnya ñáyivi chí tun. Tari cha uvi chaha chihí tun cuví cuan. Ta tyicuan caa maa ra, tari cha uvi chaha chihí ra vatyí chitó ra tuhun vaha ta ña cuñí ra sacuvi. ¹³Tari ndutya yuhu tyañuhu tatu cha nduxaan chí, iyo xaan nicuinanyaa chí. Soco iñn yaha ri tyicuan ta ndoo maa ri maa tiñi ta mihin nu niyiti cuan. Tyicuan caa maa ra, sandoó ra cha quiñi caa añima ñáyivi. Ta cuví ra tari tiñoo andivi cha cuanaa. Soco cha nyaá maa cha

cundoo ra nu ñaa iñi cahnu tyicuan ri maa.

¹⁴Tuhun maa ra cuan caħan ra Enoc ta cha naha. Ra Enoc tata cu ucha ra Adán cuví ra. Ta caħan ra tuhun cha chahā maa Nyoo chi ra, ta catyí ra: “Nyeħi chi Sutu Mañi yo cha vachí ra chihin cuaha mil ángel cuenda ra ¹⁵vatyí nyehe ra cha sacuvi tandiħi ñáyivi. Ta tachí tuñi ra chi tandiħi ñu quiñi iyó cha cuenda tandiħi cha ña vaha cha chinyacuví ñu, ta cha cuenda tuhun quiñi caa cha cacahán ñu siqui ra”, catyí ra Enoc ta cha naha. ¹⁶Ra cha sayangá chi ndo, ña ndoó ra vaha chihin cha chahá Nyoo chi ra. Cahán ra chi Nyoo ta chi ñáyivi ta iyó ra tari cuhva quichi cuví iñi coño ñuhu ra. Cahán ra chihin cha cahnu sahá ra chi ra. Tatu cahan vaha ra chihin noo ñáyivi soco cha cuenda cha cuñí ra cuvaha ra nuu ñu.

Nu chahá ra Judas tuhun chi ñu yihí cuenda Nyoo

¹⁷Soco nyoho yañi, ma quichaha ndo chi ra cuan. Soco ñicohon iñi ndo tuhun cha caħan ra apóstol cuenda Sutu Mañi yo Jesucristo.

¹⁸Cacatyí ra chi ndo vatyí nu cuasandiħi ca chi quivi ta cuacoo ra cucuacu nyaa tuhun Nyoo. Ta coo ra yoso cuhva quichi cuví iñi maa ra chihin cha quiñi caa ra.

¹⁹Ta ican ra ihya cacuví ra cuñí sacusiin chi yo. Vatyí quichahá ra cuhva cuñí coño ñuhu ra ta ñahri Tatyí Ii Nyoo nyaá chihin ra.

²⁰Soco nyoho yañi, cunhi ca iñi ndo chihin cha chinó iñi ndo chi

ra Cristo. Ta caħan tahvi ndo chi ra chihin tunyee iñi Tatyí Ii maa ra.

²¹Ta tyicuan ri ñiħi cuinyañaa ndo chi Nyoo, ta coto ndo vatyí cuñí xaan ra chi ndo. Ta cuatu tuhva ndo quivi chaa yo nu coo yo ñayivi chaa cha ma naa ca maa. Vatyí ican cuví cha cuacuhva Sutu Mañi yo Jesucristo chi yo cha cuenda cha ndahvi cuñí ra nyehé ra chi yo.

²²Ta ndahvi cunhi nyehe ndo chi ñu cha ña ñi vaha iñi. ²³Ta inga ñu, tyinyee ndo chi ñu tacuhva cacu ñu. Tari quivi cha tava ndo chi ñu nu cayú ñuhu. Ta chi inga ñu cundahvi cuñi ndo nyehe ndo chi ñu, soco saħa ndo cuenda chi ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahma ñihno ñu ta ña vaha cha cuenda cha sacuví ñu cha quiñi caa.

Nu ndiħi caħan ra Judas ta sacahnũ ra chi Nyoo

²⁴⁻²⁵Noo ri Nyoo iyó, ta chiñi tuñi xaan ra. Ta ican ra cuví ra cha sacacú chi yo. Ta iyó xaan tunyee iñi chi ra cha sahá cuenda ra chi yo ta sanduví ra chi yo cha ñahri cuatyí yo coo quivi cunyaca ra chi yo nu nyaá ra chihin cha cahnu cuví ra. Ta siħ xaan cucuvi chi yo.

Na coto yo ñana cha cahnu xaan ca cuví ra. Chi maa ra na sacahnũ yo vatyí cahnu xaan ca maa ra. Ta iyó xaan ca tunyee iñi chi ra. Noo tuhun ri maa ra nyacá ñaha tandiħi. Nyacá ñaha ra ta ityí chata ca, vityin. Ta tyicuan ri maa cunyaca ñaha ra. Ta na cuví chi tyicuan caa.